

曹  
大  
理  
集

茗上篇

辛丑

閩中曹學佺著

吳興吳夢暘

茅維同閱

別詩十三首

陳幼孺

四言古體

棠棣之華鄂不韡韡晨鳥斯飛亦以暮止四海  
之內皆爲兄弟我之所思不遠在邇其二如墳  
斯吹如箎斯偕其音孔和風於九垓風之被矣

不可以息道路間之中達弗克

其三

士隱者貧

人以爲恥亦有造物弗降之祉譬之於水其流

匪齊誰爲清泚誰爲濁泥

其四

子云病矣亦旣

久矣我馬在門不可俟矣執我之手與我言矣  
云誰之怨行其敦矣

右四章章八句

陳振狂

已下五言古體

取友良甚難勿濫道乃成知言亦匪易豈不由  
知心伊予旣占損同行得一人而子復卜遯爲

謀嘉以貞切磋日云久猥性釋所矜古人已成  
古今人何獨今我故時出郭子亦間入城眷茲  
往來迹長恐爲荆榛

林貞起

伊余未束髮出門慕儔侶鄉人竊姍笑矯志其  
誰與子長我次之一身託天叙未及半載間州  
郡叨薦舉子尚樂故丘我數爲行旅聚散乃匪  
常浮沈歷年所游道日以廣片心稀可語念今  
復當別聊爲論出處

袁無競

已下五言近體

病色子纔起征期余未休雖然之薄宦一半是  
佳遊南國到何日故園空復秋石頭城下水不  
易致書郵

趙仁父

司理遺叩竹臨行復贈詩看山與吟詠何處不  
相隨歸隱猶無計過從漫有期若論拙宦意君  
亦早違時

吳子修

七言近體

執手依然在路岐勸予行役不須悲況當白下  
閒官日盡是青樽對客時回首故山俱惜別出  
門新月便相思片鴻不斷能來往還爲題書寄  
所知

予行前一夜吳元翰陳振狂陳伯崇仲文  
集小園用陳子昂離堂思琴瑟別路遶  
山川分韻五言古詩得瑟字

驪駒戒在門我思暇以逸二三良友朋相期入  
我室長夜不盡歡路傍徒倉卒張燭照華樽舉

帷散緗帙嘯歌恒分林磬欬仍促膝眷言今夕  
會行樂庶能悉惟有哀傷感依然在琴瑟聊爲  
終此音天明我當出

五言近體得川字

未忍辭三畝因之集衆賢夜愁通鶴逕秋色落  
漁川露白踈花底風淒亂竹邊明朝此爲別何  
日更言旋

湖上宴別

出郭未數武便到湖水頭離思不可盡愛此湖

上秋銜杯臨古堤  
堤曲草復稠  
白露昨夜零  
草色如人愁  
蕭蕭征馬鳴  
與言愴難留  
相去猶不遠  
來登江上樓  
所歎潮與汐  
晝夜徃復周  
安得如湖波  
終古常悠悠  
以此論去住  
誰爲善自謀

女載叔能證弟至白沙而別

相送百里外  
猶然未盡情  
塞鴻應客信  
秋草已王程  
日落月初上  
潮來沙欲鳴  
倚篷無一語  
應自悉生平

舟中送吳元翰劒門山爲僧

出門各有適聚首一帆前渡水恐將盡入山推  
獨先心隨劒峯斷果與秋月圓何似金陵客西  
風吹馬鞭

送陳汝翔之東粵遊羅浮

我聞蓬萊三神山乃在茫茫大海間至今煙波  
缺一點飛到羅山永不還因之便作仙靈宅錯  
落峰巒杳奇絕老竹不搖大地風寒梅更奪天  
山雪朱明洞裏爲誰開葛令修仙向此來幾樹  
羽衣成綵蝶千年丹竈生蒼苔咄爾陳生何太

息采真未了思歸迫千莖白髮變應難一片丹  
砂尋不得逸思依然去粵東我逐金陵路豈同  
暮潮不覺催江上雲樹相隨入棹中棹中江水  
澄於鏡朋侶相依供眺詠五兩南風併日輕片  
輪明月中秋近奈何歡笑却成悲水陸前頭卽  
路岐劒浦分龍當此地鐵橋跨鶴定何時我今  
去去遊雲谷知君覓夢來相逐我亦有時夢逐  
君逐君四百峯頭宿

中秋夜茶洋驛同沈從先陳惟秦徐興公

坐沸雪橋看月得斜字

蕭然古驛似山家  
沸雪橋邊看月華  
竹借影過添歷亂  
亭容光入故西斜  
笛聲彷彿飄空界  
泉脉分明映淺沙  
令節詎須生感慨  
清輝元不隔天涯

洪子厓明府至又限韻得佳字

涼秋煙霧淨天街  
片月堪携入客懷  
海上飛鳧仙令到  
竹間爭席野人偕  
雪聲祇借寒流得  
山氣偏當日夕佳  
別後須知憐此會  
夢魂來徃是

秦淮

遊楊氏園四首

野色通籬落秋光閉竹關  
平池如束峽兩岸是青山  
閣信懸何地軒宜置此間  
來遊能累日亦見客途閒

忘暑復忘憂天開境轉幽  
松雲探竝壑池井辨雙流  
色落芙蓉晚香生桂樹秋  
興闌猶未已移席上浮丘

隱見穿崑曲東西出洞門  
不緣窺斷堞何以別

非村鳥信生煙住魚驚墮葉翻仍連主人舍雞  
犬寂無喧

苔深知石古竹長見牆低積翠沈波底斜陽到  
畝西搜花成小沚摘葉任分題何日漁樵老相  
容此地栖

葉坊驛雨中看木芙蓉分得蓮字

秋色辭家裏芙蓉到驛邊拒霜猶自媚濯雨更  
堪妍灼灼矜衰草盈盈間晚蓮征夫遙送目艷  
女宛齊肩微暈杯中落芳魂枕上牽故園幾枝

發腸斷隔風煙

途中有贈

素手挽香車芳容隱絳紗  
馬嘶妝忽墮蟬咽鬢  
初斜寶鏡隨明月羅裙拂淺沙  
不須同出塞移  
恨向琵琶

考亭

溪白映林青文公昔考亭一丘成俎豆歷代見  
旌銘紫籙真人氣滄洲老客星棹歌九曲外時  
復此揚舲

宿長埂

雲谷路中

山家遙借宿野氣自淒清試聽谷中水預來溪  
上鳴月殘隨曉色霜冷入鍾聲不是登臨興脩  
脩何限情

雲谷歌

君不見雲谷山幽深峭拔非世間澗傍水石遙  
相激谷口煙雲好自閒行到水窮谷始見雲爲  
客來飛片片谷中長嘯落水聲雲破山空突向  
面此山昔有東西寮藥圃蓮池跨小橋雲谷老

人不知處明月青山長寂寥寂寥千載漫興悲  
試上高臺眺武夷一呼三十六峰欲飛動跨鶴  
仙人猶恨升天遲升天絕頂何嵯峨雲中一點  
猶青螺闔天欲斷楚天接千巒萬嶂迴層波日  
光浩蕩直相迫倏忽變幻那可測老人曾記赫  
曦名奪取湘西嶽無色

朱子雲谷記云子嘗名湘西嶽麓之顛曰赫曦

臺張伯和爲大書甚壯偉至是知彼不足以當之將移刻以修其勝

同諸子登霜潭閣得來風二字

疊閣倚崔嵬無期到此來一時同看雨九月却

聞雷徑卽城頭轉窓從水面開誰家曾作賦應  
借仲宣才

去住人雖別登臨興亦同日斜孤嶺沒霜落一  
潭空野艇垂村樹溪橋度晚風鄉關從此盡回  
首悵飄蓬

別徐二

出門相追隨中道乃分袂越境歎馳驅近鄉嗟  
畱滯秋杪天初寒川原鬱少霽谷風飄清霜林  
間殞叢桂鳴蟬漸無聲來鴈自迢遞在物各有

情人生豈無繫何能釋此憂離居以終歲

望武夷

車遥遥望武夷不與他山同望之自知謂余夙  
昔來遊而今忍去之寧閉車中帷余告家人不  
能從吾言鬱鬱愁渡船一峯突來使余心動何  
日成仙住千百年

重陽前一日宿大安驛

驛路衣將換關山枕共橫故鄉畱雨色殘燭落  
溪聲續夢前年事登高明日情此身何異鳥風

急羽毛輕

雨後度大安關山水大發作歌

大安驛中山雨至客子清宵耿不寐拂曙度關  
關路長蹄寒毛縮愁征騎征騎仰嘶山水下驚  
濤急浪遙奔瀉九天落處直九地今日流時自  
昨夜崎嶇百折仍千盤魄動心摧無定看竹裏  
斜飛羽箭滿林間忽吐梨花寒雪山顏兮冰壑  
注鼉鼓鳴兮雷神怒當空走日渾無光半嶺斷  
雲那復渡迢迢達官道道道傷流蔓草嵬嵬望夫

石相去不盈尺望夫石上關山險行客出關聲  
漸減此水故趨閩海頭不向楚山分一點

鷺湖山寺別僧

大唐遙識一燈傳誰傍荒林結老禪水繞澗窮  
纔出谷月來寺徧已中天雙鷺影散湖生草半  
偈心空沼落蓮曉露清鐘猶送客飯依何日續  
前緣

丹橘行

貴溪被難時橘樹忽僵復爵仍活則榮瘁關之矣故作

君不見信州丞相第十二高樓稱綺麗雕甍共

倚黃金堂繡柱遙連白玉砌瓊恩寶澤錫嘉名  
睿藻宸題照日明方圓法式頒儀部多少金錢  
給水衡複道文窓開扇扇極目欲窮西楚甸靈  
山黛色稠疊來彭蠡湖光微渺見山川如故人  
事非聖主元施不測威胥江已見浮鷗去華  
表空聞化鶴歸魂招歸來上不得寂寂高樓徒  
嘆息火燒崇墉落劫灰塵飛綺棟無顏色可憐  
歿後見精忠青史相傳貫白虹欲知血淚何時  
滅秋老榴花開尚紅

常山白龍洞

人境初開日山僧爲客言石嵒雖盡態蘿葛不  
傷根塵到泉邊淨朝游洞裏昏何論行役滯勝  
事亦稱繁

古樹歎

我來今日歌還覓去年樹高枝望不見祇謂維  
舟誤近前却問當何處睥睨纔知物非故此樹  
匠石視每驚區區蟲蟻安能蠹一朝造物不肯  
畱赤帝雷神相煽怒本根與土忽斷絕蟠鬱如

龍失其固連峰疊浪勢豈存恠鳥巨蛇奔不顧  
空畱一片煨燼餘好似殘碑久應什樹乎樹乎  
奈爾何去年今日難再度

桐江阻風戲東從先惟秦作

惡風打船沙嘴坐白浪如山苦難破主人閒擁  
少婦眠篴篴一曲嬌無那方舟至近不能來却  
笑陳生與沈大吳市空懸幾日歸釣臺却恨三  
更過

武林

蕭蕭襖被隨江雨，但入武林不知苦。  
盤中紫蠶出客嘗，樓上黃花向誰吐。  
持螯把酒行且歌，晚晴不出顏將酡。  
明日西湖仍盪漿，六橋秋色較無多。

龍井

風篁過翠嶺，霜磴入珠林。  
置石虛疑出，分亭異取臨。  
潭空浸寒玉，湖遠湧秋金。  
虎穴烟中隱，龍泓月下吟。  
棚疎隨木繞，爐潤却塵侵。  
應是流泉處，遙遙落梵音。

湖心亭

中流開棟宇孤嶼沸笙鏞點浮疑是幻表立儼  
爲宗井幹文浪寫複道綺雲封日行光遞嶂風  
到響交鍾城連東曠住隄作裏湖重傾都游士  
女競以辨妖容

煙雨樓詩

端居驚勝想鼓枻成佳遊魚悲置筌密鴈喜遵  
渚修前楹帶郡盡後區蕩空逾光凝有夷鑒籟  
寂無奔流蓮凋旣委夏籜隕復辭秋但逢朔風

起木末鳴颼颼

和徐茂吳隔舫聞歌

未得青蛾就聊於綵鷁聯吐音純裛桂障面詎  
依蓮並囀中藏敵微停暗若牽遏雲俄溺舵湧  
水復升舷那能時顧誤祇可密尋憐

和姚叔祥賦得脚下履

裁絲恒準約置繡但從低采桑初上路鬪草漸  
縈隄似蓮旣並蒂擬鳳還雙栖雪跡尋偏膩香  
塵試復齊隱兩微窺隻當東更向西無心作細

步惟有仲卿妻

湖干晚步因至城東訪姚秀才邀到南樓  
寓中少酌復送之橋上而別

坐對湖水悶下樓試芒屨明霞已漸升斜陽自  
西落市上歸人喧予心在寂寞便叩墻東隱開  
門喜欲躍雖云相訪來實如偶遇着豈惟子無  
期予亦不自度入城仍出城送情不薄逶迤  
到我寓開尊理清酌盤中汾湖蟹雜以閩海錯  
詎能長夜留須臾卽云樂河梁惜分袂關門趁

收鑰獨立天茫茫漁燈動湖壑

同陳惟秦擇公渡練水赴茅孝若招

槩子來迎我詎須愁問津同僧更携友有客成  
三人風入枯桑暮河明早雪春離情不易盡取  
醉定經旬

瑤山寺懷皎然上人焚詩處

一艇門前泊高僧遠足論詩非焚却廢刹以古  
來存極浦源無地寒林葉聚根所懷遺韻勝安  
得遽忘言

九松墳

地下無相識客來應爲誰高歌一揮手如此好  
松枝異勢不相學高蘿能互垂清風趨返棹蕩  
影過前陂

夜宴孝若霜鶴堂遲吳允兆不至分得除  
君二字

宴客華堂上厭厭夜飲餘鶴鳴來野外霜吹被  
庭除但慙行杯緩那容列坐踈應知不歸去旣  
醉復躊躇

有信來期我何言更待君  
屢瞻霞嶠月未到  
雲川坐憶相爲樂  
行歌不待醺  
近聞耽白業從此遠清芬

聞陳仲文移居却寄

問汝移居好池園媚小春  
鵲鴿飛不遠燕雀賀  
宜新蔣徑能留客  
潘輿喜奉親  
祇應懸一榻爲有未歸人

移寓題主人壁因寄家

嘉禾已近金陵道  
欲行不行歎衰草  
延尉署中

卷之六  
乞假寬主人樓上栖遲好南湖湖水日含煙花  
樹亭臺湧我前杳然坐對無朝暮不費舟人索  
渡錢一行柳樹當簷遶歷歷開窓數歸鳥有時  
枝葉動參差能使湖山增縹緲停舟又是兩旬  
餘不斷鄉人好寄書明朝更欲移家去依舊臨  
湖樓上居

之天目舟經烏戍阻風宿擇公禪房

平生故有好奇癖冒寒欲尋天目遊我聞東西  
兩峰拔千仞登攀手脚凍死願亦酬河干風色

太作惡咫尺不得移輕舟誰爲相送更攜手一  
笑詩成空惠休游興蒼茫無所寄聊向禪房討  
幽事枯枝動搖直指天薄雪飄飛那到地黯淡  
深閉松扉中兩朶菊花猶自媚此時乃爲開酒  
禁花前任與陶公醉酒酣一據繩床眠真性潦  
倒非遜禪耳熱風聲已在後眼合山光突向前  
君不見高峰昔曾此出家吾今信宿緣非賒當  
年覺路知何處明月青山空自斜

復阻風泊古山寺

扁舟興屢違一日行幾里野寺無人烟託宿聊  
復爾君不見今朝風狂夜月好蕭蕭竹影臨窓  
老

初到白雀寺

兩三夜裏頻過寺五十日來纔見山便陟崔嵬  
試高詠一沾蒼翠開愁顏月在長松已自好霜  
飄野草何時閒問誰悟得西來意石塔久沒青  
苔間

山有尼總持塔爲一祖弟子

晚發菴畫溪次日登烏瞻山成宿十首

野酌戒揚舠溪昏去復停淺沙催月白密樹誤  
峰青鐘出城中寺燈懸畫裏屏時聞清籟發風  
急水泠泠

月光來滿溪霜落月仍西兩水聽初合羣峰看  
尚迷林殘不宿鳥村冷先鳴雞欹枕渾無寐催  
人起杖藜

蕭蕭竹木村不見有朝暾問逕過田父呼人識  
澗猿橋臨澗岍險後出深溪喧一入山中路藤  
蘿信可捫

千叢虎迹過乘興但高歌白石泉非淺緇衣雲  
更多遊人茲世外隱者昔崑阿不攬諸峰勝其  
如秀色何

鐘鳴到古菴老衲出峰南雲霧連山茗天風落  
石楠竹深成幾處苔淨自幽潭故址聞寥落荆  
榛奈可探

獨鳥向空飛登攀興不違雲中忽漏日嶺上片  
生輝逸思堪題竹清歌信采薇谷風一以急吹  
散樵人歸

天陰望太湖莫辨是三吳山外應環繞烟中乍  
有無一方深且廣此地僻仍孤明發占新霽寒  
林早集鳥

絕頂與天通攀躋逕始窮望來千嶂合祇爲五  
峰雄亂竹如青草羣川似白虹岡頭試金彈自  
昔有英風

有彈子岡相傳陳霸先所遊得名

遊者自成羣山頭南北分湖峰動雪意池劒涵  
星文豹隱應能識漁歌若有聞荒碑看欲盡感  
慨爲徐君

北菴有徐子與碑文

門閉壑千層光明放佛燈梵從此山起月又昨  
宵升故有長吟客應添不寐僧開窓樹花白盡  
已結晶冰

回舟溪上雪五首

顧太守相迎

昨日趣晴好五峰揮手遊今朝山下路又是雪  
中舟

太守來迎我有船在渡口乘興山陰雪去沽下  
箸酒

溪行二十里十九里曲折前灣雪一丈後灣雪

五尺

舉杯看飛雪雪白映顏酡如今不盡醉溪上暮  
寒多

蕭蕭菴盡溪船頭看不見盡工不可測橫絕一  
匹練

與丁長孺

子居故鄣邑我乃閩海潯山川旣阻修踪迹仍  
浮沈吳門有兩士能揚千古音我子各得一以  
此慕用深子昔使我國我尚伏岩林我茲客樵

李扁舟相爲尋見面素所好樂哉不可任子病  
爲我起我悲爲子吟疇不稱忼慨忼慨者滯滯  
此道自古然匪獨患在今

臨雲閣歌

臨雲閣上千峰集晨雪未消暮雪急玉杯雙鬟  
持且歌楚江芳草將奈何呈嬌逞媚樂未已當  
年主人爲爾死今夜那得歸客子

答顧仲穆

門前枯樹客船繫三日不歸如有情主人更唱

別離曲何限故鄣山水聲

歸卞山送施靈修之武夷

已盡長興勝雪中時返棹諸峰試回首一半是  
瑤華蒼弁人將別烏程酒耐賒臺應過釣瀨關  
必度仙霞到處可爲醉此生寧論家武夷拾彩  
翠羽客飯胡麻折筍松檟直虹橋鳥道斜得予  
同去好其奈阻天涯

白雀寺長至習靜

出山更入山在境欲離境身留與寂俱徒謝隨

喧屏辰接天香濕夕卧雲榻冷廣殿冷湖光中  
門立塔影松翠扶近巒雪白明遙嶺禁足示關  
閉焚香觸灰警際此一陽生庶其百慮靜

游沈家洞

香積罷分餐下方任散步携策出寺門揮塵指  
洞路隔嶺呼童應分林追僕誤徑委屢涉流谷  
虛亦遵霧一區疑詭成亂石駭奇吐鍾乳懸爲  
梁雲根結作樹上有天光蔭下漬青苔露入深  
必火攻事偶等沙聚興盡仍言歸岩林幾重暮

碧嵒歌

法華寺裏鐘初鳴  
客子催人山早行  
深林嵐氣掃不徹  
此時那卜天陰晴  
湖烟一聲向空裂  
忽見帆光五湖白  
青天高高無片雲  
峰頭之日照白雪  
白雪皑皑黃金容  
欲消不消千萬重  
昔在溪邊倚蓬望  
正此積雪之遙峰  
峰形崢嶸張龍口  
雪中虎迹大如斗  
白鳥射入不見影  
猿啼只在人前後  
琳宮玉殿連雲裏  
寶蓋風旛拂湖水  
一片珠簾凍不垂  
香爐氣濕無烟起  
昔日高僧

安在哉空山說法成荒臺不朽之木何時死金  
蓮之花何時開我今有身不能捨空令惆悵碧  
崑隈

黃龍洞看太湖歌

君不見黃龍洞其深下無極視之但似蒼蒼色  
令人憂疑直相逼既有異香縹緲從風吹又何  
以白骨倒挂枯樹枝我聞老龍在此藏其軀至  
今千年知有無其靈既能興雲雨磔犬祀之無  
乃誣龍乎好睡亦太嬾我欲擲石破汝眼爾何

不翻大海波亦不潛深山裏在此區區一勺之  
湖水湖光雖有百千里吾爲爾謀應未已但見  
日自西沒風從東來舉酒酌水飲我一杯遠者  
七十二峰以羅列其近大雷而小雷有如雲屏  
錦障蕩漾於水晶之宮盈盈進我雙金疊具區  
形勝盡於此千秋吳王霸圖安在哉但聞別館  
離宮滅不見牙樯錦席開湖水暮兮悠悠蒼烟  
橫今上浮羣峰杳今乍收客亦去兮不可以留  
我更呼龍夢中爲我語使我空山一夜愁風雨

圓證寺

我聞圓證寺卽在碧崑隈積雪一峰阻看雲十里來僧厨流水曲香氣講經臺最喜茲幽徑松陰寂不開

避洞

蒙茸荆棘似人長車頓途迷白日荒故是幽深通地肺猶能隱見受天光空山未信金銀穴淨域俱爲麋鹿場莫更躊躇思此處兵戈今已不堪藏

別卞山三首

客問卞山境卞山境非一一峰看不遠十日行  
不出

欲作卞山樵腰鑱苦不利別汝苕溪去且尋漁  
父醉

欲別山更好殷勤此翠微東風吹作雨片片上  
人衣

夜渡碧浪湖宿顯山

湖風不可渡暝色况如斯漁火祇自照林鐘非

三期叩門僧出問何事客來遲禪室投不穩猶  
於深夜移

曉起顯山眺望三首

顯山昏黑向人愁路滑燈微亦浪投一夕湖風  
吹雪散五更寒日上峰頭

逸老堂前生事微窪樽亭上酒人稀有風只在  
湖頭響不見蕭蕭髮髮飛

一片波光自渺冥隨風直欲蕩山青客心無限  
悠悠去興落中央浮玉亭

歸雲菴吊孫山人太初

歸雲菴前雲不歸，雲歸猶戀山人衣。  
掛瓢堂上瓢已空空聞淅淅，吹西風孤墳片碣日摧毀。  
布衣論文事已矣，不作尋常酹子酒。里中善夫子之友。

苦寒

飄零隨八口，留滯爲微官。則是深悲日，那能不  
苦寒。湖風交浩浩，海氣到漫漫。柳觸空枝直，梅  
思破蕊攢。冰鱗貪聚沫，陽鳥待歸翰。杯澁無新

釀厨清半減餐書籤遲過幅爐火迫燒丹脆惜  
毫輕禿堅愁研屢乾髮垂連沐廢齒擊未吟安  
烏几欹難穩貂裘敝總寬雪花猶不發霜月幾  
曾看莫恠思鄉甚其如行路難

金明寺訪絃公

累日苦凝寒茲晨喜暄暖履霜訝庭素蕩湖覺  
船緩丈室旣深入迴廊匪一轉劫灰四壁古茆  
茨數椽短依垣藤蔓上傍檐梅枝偃師出我不  
值我坐師亦返趣諸自詩編疑釋以經卷愧許

莫酬支似潛時赴遠則是無喧囂因之成游衍  
真如寺

兩寺隔一城城外彌幽趣湖烟夕欲浮岍水時  
已錮光與修渚迴暝預重林赴勝旣分房闕跡  
亦攷代故俯挹雪峰井高見長水墓老槐但空  
根石梅久移樹惟法爲不滅在物豈能固

吳翁晉見訪各賦五言近體四章

素雪欲墜地黃雲愁滿天未成洛陽卧已到剡  
溪船客裏少人事杖頭餘酒錢入門乍相見定

識此畱連

茗上溪山好君家山更深昔遊不及到懷侶一  
長吟豈有風吹去悠然落遠林因之命短棹歲  
晏此相尋

白下憶分手秋光慘不繁當時未盡意今日許  
重論爾病須添老予歸又出門不知千古事誰  
爲一窮源

會合應難再風光信自催肯畱十日飲便道隔  
年回煙雨樓中積梅花湖上開若爲易分手兩

地復徘徊

夜雪送吳九歸

之子難留處深更雪正飄  
冬春幾日逼谿谷兩重遙  
出戶逢泥徑披裘上石橋  
燈光不見鷁風力欲欺貂  
宿卽河之許人先別此宵疎  
蓬侵素滿遠樹雜花嬌  
寒醞行須備晨暾未必消  
仍孤逆旅客無恙在山樵  
明歲看梅候還期早出茗  
茅鹿門先生輓歌二首

宿望當元老嘉徵自國祥  
四夷問安不天下稱

文章健筆何曾絕  
虛舟不待藏鳳笙  
將鶴馭達者返蒼茫

似公何復憾在世  
亦應稀七日不火食  
百年終息機行杯  
自荀爽間綃值胡威  
孝思天爲感于今  
願不違

除夕前柬姚叔祥

旅舍高眠驚歲晚  
爆竹風吹耳邊滿  
誰家課奴收帛錢  
誰家喚伎張絃管  
牆東有士隱且貧  
四壁蕭蕭甑裏塵  
心閒一任年光去  
祇似天涯索

莫人

除夕

一從爲客易蹉跎  
南北風煙幾處過  
自數十年除夕裏  
在家時少別家多

芝社集

癸卯

閩中曹學佺能始著

同社林光宇子真閱

元旦

平生負少小倏忽已三十志意日夕馳茫然誰  
向立挂名于仕版職守不相及昔云朝無人不  
如耕自給水聲舊年去山色新年入其時匪不  
春羣動尚安蟄觀化得自然浮榮非所急

隔簾看桃花

偏生旖旎花盈盈間珠箔彼用妙卷舒是姿等  
開落春風如有情兩美交相薄艷姬尚處帷駿  
馬欲驕絡塞頭不可盡望望迷沙漠

洪子厓明府俞君寶陳振狂集小園同用  
微字

入歲閒居生事微使君騎馬到柴扉便湏薄酌  
無供具况復平交有布衣山月已能分雨色桃  
花偏欲傍燈輝不知誰擅陽春曲一唱堪令  
者稀

子厓招集署中同用居字

野鹿走階除蕭然水竹居  
夜寒當客滿春勝占公餘  
火樹知時發鐘聲過雨疎  
酒酣歌自起不  
是爲無魚

八音詩

以下二首徐興公直社

金風氣初厲石滿角弓鳴  
絲綸天子詔竹帛將軍名  
匏樽潛度水土穴暗穿營  
革褻尸猶願木  
就怨難平

詠走馬燈

連騎看燈匪一羣燈輪賸有騎紛紛似調金埒  
光俱射漫拂絲鞭響不聞日沒猶然行赤地春  
深信自踏紅雲百年人世皆如隙爲樂蹉跎任  
夜分

贈王穉玉轉運

青瑣從容侍從班獨持鹽策見時艱陋言析利  
秋毫裏多在論文杯酒間高臥夢歸臨海嶠公  
餘步上越王山此中旦夕應難借已識明君  
早賜環

福唐送葉少宰

未得山中信來乘江上潮不辭相見易終惜別  
離遙物色已開歲主恩深在朝路傍問何客  
征馬自蕭蕭

與林吏部

消息茫茫久不傳粵西薊北異風煙邨堪苦憶  
如它日縱是相期復隔年一夜驛程猶作客千  
重雲樹欲尋仙不知子晉吹笙去何似山公啟  
事前

福唐有石竺一端岩皆仙境故云

同陳振狂遊瑞崑

海氣凝奇狀山形建瑞標  
虛中能不斷古色未曾消  
雲去時穿石泉來每應潮  
與君行復賞人境正堪遙

大田見梨花

千樹梨花見馬頭  
峽江江水向南流  
行人但指山如雪  
不辨和煙帶雨愁

半額園聞鶯

鄭思聞直社

山亭隔俗豈鶯語入春嬌  
欲覓之花底猶言在

柳條思因初霽發情寄好風遙况我稱良友相  
求在此朝

平臺閱兵

林子真直社

春遊羣彥洽曉出六師齊白羽迴明月朱旗拂  
斷霓平臺劒氣盛疊嶂鼓聲低晚際憑欄望荒  
原烟霧迷

送人

未慣出門去一行途渺然波寬無過楚臺迥必  
推燕遠別輕愁思多才仗少年所之饒古蹟定

擬有新篇

送丁亨文民部赴京

門閉青山裏舟行綠水邊  
別離寒食雨辜負艷  
陽天禁苑鷺方細官曹杏獨然  
長安惟大路猶得直如弦

李獻吉有下糧廳見杏花詩故中及之

楚游不果歌

春來駿駿動楚思欲行不得嗟  
生事心裏難論今日愁眼中空蓄  
古人淚閉門落花橫惹烟落花不  
點洞庭船幾作洞庭湖上夢青草  
迷人何

處邊

花朝

二月春欲半百花朝舊名此中開已落不復較  
陰晴列燭幽林影踈鍾隔水聲他鄉行樂處獨  
有故園情

清明日西湖觀漲得微字

積雨晴偏好遊人思欲飛信移湖上棹忽入田  
間扉山翠浮何遠松根出亦微况於佳節值一  
倍使忘歸

上巳登烏石山

開朔卽元巳天清風物閒由來好臨水今日亦  
登山石路盡生草春衣初乘藺澄江百里外欲  
爲祓塵顏

西湖脩禊同賦七言排律得臨字

上巳西郊芳草深聯鑣接軫競駸駸浮橋直似  
通青靄高閣虛堪映碧潯玆借小山渾積石隄  
連曲渚亦千金簫聲松籟遙將和扇影波紋近  
欲臨濯故却憐同解帶布新誰分獨開襟觴行

竹葉春無限舟逐桃花漲不禁迎犢醉魚嘉事  
集貽椒沅棗樂方尋韶光已足淹晨莫人代何  
知異古今

雙溪流觴分得四言平字體

王王生王粹夫直社

行行東郊深無人煙言登崇岡仍趨平田雙溪  
同源其流濺濺天成之溝因爲周旋賓朋來斯  
居同衿連流觴何遲隨人而遷遐思前人由之  
無愆

池亭聽雨

烏石山下同子真作

翠色遙如沐橋邊徙倚看俄然半山雨來作小  
池寒鄰女安花架溪童理釣竿深杯足談笑不  
覺自更闌

### 送俞山人

不曾之九鯉此際有仙臺欲覓丹方去其如歸  
夢催溪灘積雨峻春月好山開亦有蓴鱸興秋  
江擬棹迴

### 汎舟西湖到北菴得多字

黃伯寵直社

大夢山前起棹歌青青初泛水中荷乍看漲色

西湖遠却較幽陰北地多堤上有情觀士女林  
間無偈問維摩酒酣不識春城路明月盈盈臥  
綠波

小園春暮

春事倏將盡閒情誰與羣平池魚欲近幽徑鳥  
先分移竹迎朝雨留花待夕曛不知何處鶴頻  
送幾聲聞

初霽同林四泛舟西湖登夢山墨池之勝  
山色城中滿看山亦出城却憐春欲盡正值雨

初晴坐得野亭曠到來湖水清詎須問佳不于此已忘情

隔岸來舟子櫂歌春涉烟且縈隄草曲少泊水松邊孤嶼別成境幾家同種田遲留真不厭日莫始云旋

舍棹之村裏人煙復一丘綠楊藏水榭青嶂鑿山樓有業俱歸淨無期轉入幽眼前車馬道逝水疾難留

絕頂多奇石巉巖最可登風歸松際籟天入壑

中冰鳥篆苔將滿  
鳥栖跡尚仍欲歸  
翻感慨始識興無  
恒

三月晦日集塔影園送春

王元直當社

今朝還得及春遊  
寂寂春陰不散愁  
欲管鶯花無限思  
祇憑歌舞也堪留  
天垂古塔將分影  
水到疎鐘不隔流  
解却韶華真瞬息  
隨時行樂亦何憂

邀畢孟侯登烏石山風雨忽至

霽色登臨處何知  
風雨來大江遙見  
浪空界隱

聞雷杯迴千峰接亭危亂石開所經多變幻能  
使客心摧

同孟侯夜集林天廸草堂

好雨能晴夜涼天出夏雲草堂初秉燭松楊靜  
論文泉迸三山落鐘傳萬戶分何當坐明發忍  
見即離羣

送孟侯

昔者使臣乃重詞命吳之季子列國爲聘惟盼  
與僑而交斯定展彼孟侯其人則稱履道如砥

觀物如鏡來余閩陬猶晉適鄭式廬之役猥及  
不佞悠悠山川以爲送迎奕奕文藻以資諷詠  
謂余一言烏敢不敬侯其行矣古人是正

初夏澄瀾閣得微字

康季鷹直社

夏日試荷衣高樓送目微水偏此地得山半是  
城圍澗色猶殘雨蟬聲自落暉定知湖月好坐  
待夜深歸

薛老峰

陳惟泰陳伯孺共直社分賦烏石山一景

烏石何者最高峰僊令昇之乘飛龍龍飛不可

以攀躡青霄一片空芙蓉我聞神僊多遊戲有時直拂天風至笑指人間俗事多祇認當時片石醉

集河口鄭氏別業

高敬和直社

此地入已僻遙望山上臺日光背營落石勢隔河來密竹疑無路空亭已自開漁舟何處返信有暮潮催

西湖觀漲

林天旭招

湖頭新水漲携棹出看時芳草全迷路青松半

偃枝已堪容醉客還欲蕩妖姬不盡淹留興山  
山暮色遲

變體三艷詩

一片香雲初覆額閨中聲動江南客生來幽閒  
本至性鉛華洗盡開霜鏡相逢却在芙蓉池水  
底新粧步步移不知少小偏多恨抱着琵琶欲  
訴時

東風吹裊楊柳枝楊柳章臺飄作絲枝頭好鳥  
鳴翩翩一種身輕還並憐碧窻如水花紋入含

嬌却面金屏立羅衣宛轉解相親就中欲抱郎  
君泣

雨歇松棚露猶滴涼天月明皎如璧美人歌罷  
雲乍起尚隔荷花半亭水自言流落酒家胡誰  
分當年自有夫夫婿擣蒲傾百萬爲妾還留明  
月珠

汎舟藕花陂歌

有序

地名北垞勝擬西園菡萏敷榮澤芝吐秀青  
山映則成黛綠葉扶始勝衣客止七人追鄴

都之飛蓋粲云三女宛越國之蕩舟各賦短  
歌一章余復有所代焉

五月池塘生碧荷六月花開嬌綠波呼取美人  
來勸飲美人顏色較誰多僊舟竹下遙相待綺  
席波間時復改一片斜陽落不分朱霞迸作青  
天綵

右得綵字

蓮花有艷不解歌妾歌一曲愁更多蓮花漸見  
舒紅粉妾身祇自顰青蛾感君見贈雙白璧淚

比明珠爲君滴滴向蓮花倍可憐中心之苦還相覓

右得歌字

紅蕖白蕖顏色亂的的如朱復如粲錦波素足涉畏深身比蓮花纔及半荷風一動池水香猶如千斛瀉瓊漿三婦艷中年最少獨自調絃方未央

右得粲字

北山芙蓉寂無語北垞芙蓉嬌正吐可憐出水

一時粧欲開未開待何許輕舟蕩折歸復遲送  
客留髡正此時山頭明月乍流影不知偏照盧  
家姬

右得姬字

賦得白雲抱幽石

已下二首趙仁甫直社

白雲時舒卷片石恒孤貞蓮峰低復隱枝葉漫  
相縈象虛詎無着中堅斯有情幽人日靜對欲  
以締深盟

清風松下來

斜日澹無色高松迥不羣驚濤一以瀉寒翠落  
紛紛對酌不覺滿臨流無定聞欲知何所擬謾  
謾爲夫君

河漲望鼓山

河水有消長山色隨近遠余家寄河上日日得  
疎散久雨人事絕不覺河水滿東方新氣發明  
月照高巘雖在江海外顧爾親何宛委巷寒已  
積蓬門勢斯偃既退俄復進蕩搖難得穩室家  
任浮去長有青山伴

今歲入春思楚遊至今八月空清秋君山一點  
時在眼何必岳陽遙上樓

荷亭小集

同吳非熊謝耳伯周方叔王相如徐興公林子真林茂之諸子

分賦五言古  
體得筵字

賓客四方至惟日張盛筵二三素心士我志默  
所專之郊未及野茲方欣云偏列雉勢逶迤湖  
水與之沿輕舟豈不具合坐情重遷發言入妙  
理要之徵幽玄

與周窾六

遷客來閩中風景亦不惡  
署曠偏依樹庭閒可  
晒藥談詩杯酒間  
悲壯故自若傷人了不顧  
觀者何落落我也一官如棄置  
三年歸家總無事  
踪跡多從山水留  
名姓或堪朝省寄  
神物邁會亦有時  
埋藏千里光陸離  
如何昔日長安市  
馬首相逢總不知  
此地含沙伺人久  
縱然目攝須緘口  
何如君謫我歸來  
海天寥廓看携手

中秋集林少保舊宅

謝傳若浮雲東山月還出  
劃然開中天何知處

一室嘉樹日以長甘泉時復溢昔賡在陰詠鬱  
有其文質遺音不可渝詎隨琴與瑟伊余幸遊  
只堂構具云悉雖過三爵樂威儀終秩秩所保  
在良辰遐思以昔日

十六夜集平遠臺看月歌

王相如直社

昨夜月過今夜老今朝客較前朝好我輩何煩  
羽扇揮太清豈俟浮雲掃高臺崔嵬江水抱潮  
聲欲射登臺道須臾海門亦疎豁月出微茫露  
瑤島平看大地盡如縞地上月在長松杪盈盈

正對華樽倒金屋憑將團扇裁玉閨任取文砧  
擣但尋客子眼前樂那知思婦心中慄人生安  
得常自保秋序平分已衰草憂來易與同枯槁  
君不見夜月墮今扶桑杲

山中泛湖

寂寂山中湖湛湛湖中水湖水能幾何月色亦  
如此雖無盈樽酒泛之不能已自笑還自言心  
中聊可喜墳墓何累累寐者人已死中夜來遊  
斯應惜有知已

鄰霄臺大社

阮堅之招

累日處山中茲辰厠榮宴釋彼林谷氓而洽江海彥同聲自相應何必論會面高臺行以軒在下俱可見長短互阡陌東西竟陵甸明晦詎云常乃貴景物變有如君子懷靡物不蒙眷休美罔攸匿瑕類亦可薦謙恭力罄折流覽肆將徧衆賓旣飽德猶然享豐膳感慨竭所蓄援筆爲述撰不重千金酬惟要一言美幸哉不腆邑風雅庶云煽

吳非熊林茂之過宿

秋園空似水有客亦佳哉  
雙榻夕俱下一尊涼  
自開吟成枝鳥睡機息  
野鷗來迢遞金陵道  
憑君歸夢催

舟中有懷效古七解

繫我出郭在此水湄車馬告息  
猿猴相追一解  
谿風怒號其來莫支  
旣入我室復處我帷二解  
人之不閒終日如馳  
忽焉寂寞中心多思三解  
謂室則遐不在今日  
遐之與邇其思則一四解

朝之思兮夢爲我仇今我不寐欲何以求

五解

山月初上浦舟微浮淒淒白露惟草是油

六解

離鳥夕宿其鳴啾啾余亦歌且以寫心憂

七解

九月朔日泛舟西湖晚登大夢山

人情多好新遇朔每更思況乃當秋時俄然已  
稱季閩服恒鬱蒸茲辰始秋意字清無所着雲  
薄祇猶寄曷言寫滌朗湖水聊可試理棹命酌  
之汎汎隨所至離岍雖甚徐到山不覺易薄言  
陟其巔俯仰同一視以喻遊者懷曠然何復累

其二

蕩湖晨已曠登山夕旋幽興不與晷盡秉燭斯  
可遊月之初生時猶然用晦伴崎嶇信披陟不  
復辨所由山中何黝眇惟見松與楸瑟瑟谷風  
起入樹爲激流俯視多雲烟城郭環旣周湖水  
亦合之詎分爲沉浮處暗寔多患凜然不可留

西禪浦夜泛

馬季聲招

問津寺門路遙遙送孤鐘浦口雖云狹漸以臨  
大江江路亦有常但與潮汐通燭火代明月漁

者聊爾同林葦風颭颭所過非一峰戒心告乍  
息當路有偃虹如此歸已矣夕漏聞之窮

西隄晚坐

同謝耳伯宋永延

青山有佳色晚向湖心墮出郭步看之適意便  
當坐一舟湖中行無人亦無柁不呼來漸近似  
欲以迎我微風吹之去悠悠復不果隄上夕陽  
盡歸人自成夥彼幸不見譴予惡知不可

瓊河夜泛至鼓崎舟中限韻刻燭成五言

絕句十首

吳非熊謝耳伯徐興公林茂之同賦

潮平纔沒纜日落半橫窓去去登山路悠悠此  
渡江

白龍還在不我有降龍法薄暮清風生半江靜  
鱗甲

嫋嫋千竿竹風吹動水涯密林月欲出幽意與  
之偕

寂寂雲稜薄月光照寒港譬之如明珠吹沙出  
老蚌

美人期不至勝事却難兼所嗟江月好不肯關

眉纖

乍暘游樂懷復有離愁攪何如枝上翼雙飛覺  
爲巧

漸東江中路還移石下潭登高須日九水泊已  
更三

霜落水上寒披衣出憑檻歷歷峰陰遮半邊月  
色減

泊舟不能寐指點入松杉欲於今夜半乘興到  
巉巖

崔嵬白雲冠林葉似衣絳山靈却疑我天際真人降

清晨到白雲廨院得陽字

叢林露曙光雲氣密蒼蒼淨室尋猶得飛泉坐  
可望舊遊思舊歲重到是重陽野草知幽意翩  
翩鬪菊黃

茶園得青字

地驚能最勝跡喜不曾經是處雲分白偏秋樹  
損青江於斜閣散石受短牆扁好茗隨多乞流

泉試一聽翔雞知客異防虎託神靈野老相邀  
看輿人不共停冥搜非舊路空殺半山亭

靈源洞二首

古洞閼靈區中天開石扇俯峽峭以深緣厓紆  
而蔓澗虹旣跨雙谷風復吹萬神瀛詭其脉江  
流曠於面異哉遐與邇當身有迷見

石上題名字蒼苔爲之襲摩索雖甚艱久之亦  
漸習乃知遊覽懷昔人於我及出谷鐘似吼入  
洞月如吸岩房此栖託逼仄聊自蟄僧梵雜蟄

帝客眠讓虎入

九日黃郡守王轉運阮司理邀屠儀部林  
民部至賦得四言一首

彼美君子邦之司牧爲政多暇自公休沐曰易  
斯升亦晝是卜邁以其旅樂匪云獨汎汎江舟  
駸駸巖軸崑高洞深雲飛嵐伏青蒼石色挂於  
林木旣曰近怡誇此遐矚虎以象山馬以名瀆  
或踞或奔以鬪我目白煙若虹截江之腹隨風  
蕩去其流可掬大夫作賦文哉郁郁刻石千秋

令聞有淑

王園看菊一首

同吳非熊袁無競林茂之  
王粹夫

閩中百卉早何者爲獨後黃菊無一枝空已稱  
月九今日好事人忽向柴扉扣告我菊花開攬  
衣與疾走只在隔河曲其地亦盈畝辨種誰者  
奇分叢某家有憔悴若含情霜薄花不厚遠見  
青山色近乃登崕瀟瀟微雨來虛亭無四牖  
主人雞黍熟歡言以酌酒豈必佳與冶樽前鬱  
金婦若不類然歸秋光恐辜負

又過陳園

攀條每易處秋色能駭人渡河已故步其位與  
我鄰我鄰詎不邇要非情所親町圃畫就治詎  
若雜無文物性得其養較前殊繽紛魚鑰爲我  
啓曲徑步逡巡芳沼鑒移月高樓抗入雲花木  
百種繡禽鳥五色珍燁燁開若夏嚶嚶鳴如春  
應接實不遑亦覺怡心神浮情但逐境取舍烏  
能真

餽菊

天柱篇

癸卯下

閩中曹學佺著

同社

徐惟起

林古度

閱

渡峽

渡江猶不深聞道險難臨  
濤白忽迷眼猿啼都上心  
雙門中作峽五虎側爲岑  
去去有時息所懷非故林

登石竺山二首

息徒改俗轍尋仙騁雲轂谿路綿以紆山形拔  
而矗入初狀倏呈披奧境徐蓄千崑若累層萬  
樹信攢獨曰帷固甚密爲宇何其複卽此乘虹  
飛因之瀕鯉伏朱鳥現毛質玄猿衍類族托命  
於仙靈詎爲人所畜我來一叩之入門展欽肅  
耳目懾靈異烏敢恣云欲

燁燁丹芝草所處在重雲攬之不可得彷彿聞  
餘芬岩巒深已暝五色呈靈文我欲食此草因  
可辭世人譬之江海遙渺渺浩無津滌情屏物

累要道得所親神仙爲導引靈器自然陳寄言  
淮南子八公斯我羣

黃蘗寺

朝辭石竺路透迤暮入禪林境始移橋下清渠  
爲草積門前古樹作藤垂諸峰翠黛分深淺一  
勺寒泉歷歲時昔日江淹來此地懸崖何處有  
題詩

香城寺二首

有寺如茆舍當年盛佛場林花開異色石乳出

天香虎自聽經伏禽因施食翔誰知今日裏客  
子獨披荒

蹉跎成去境深阻有歸程遠海日爲蓋亂山雲  
作城螢光浮澗濕竹吹掠風橫已得前來寺如  
同抵舍情

龍潭

雖云七潭水定有幾龍蟠不礪因辭繞無梯亦  
輟盤冥冥乘氣下冉冉自空搏璀璨日成幔嵬  
峨雲作冠按音非一部取象亦千端爲雨俄爲

雪似雷復似灘簾垂不可盡珠碎更能完周姬  
耽裂繒班女恨裁紈蓄素仍舒采看碧漫成丹  
上古終無霽四序但知寒猿啼頻失響禽翔屢  
落翰盛徒喧笑入猶然覺旅單

絕頂行

高山有奇洞靈物之所處其觀多恠譎大言似  
夸詡我直持一勇於以勝百阻路長到實難食  
人有猛虎天陰日無光雲霧作細雨潭壑乍隱  
見鄉縣悉周溥仙人雞犬鳴聞聲不可覩入木

成矛戟叩石如鐘呂遇物雖駭新本質實已古  
好遊不學道來此亦何補

重到鯉湖

已是行窮日翻然夢入雷惟其當夜後所以盛  
秋哀嬾複何知改源深莫測來昔遊成幾歲亦  
見景光催

其二

晨起看湖水千重煙霧翻祇從天上落非是世  
間喧竟日坐磐石有時攀樹根仙人不可見丹

井自潺湲

麥斜

好遊無定迹山水送昏朝  
乍息聞澎湃終安處  
寂寥幽局嚴却轍偃樹  
卽通橋有石皆成洞層  
樓判入霄雲真從下起  
旭反自幽招曲澗疑笙  
吹叢篁儼珮搖蒼苔存  
古色黃菊表霜條已識  
秋無恙誰云境匪遙林  
深遲返翼谷迥早歸樵  
應洽丘中趣斯賡隱者  
謠

宿楓亭

馬上看楓色  
床頭披荔陰  
不知投古驛  
祇是宿寒林

萬安橋

功成前太守  
行者每咨嗟  
石峻猶成堡  
潮平祇似槎  
奔星閱車馬  
成市集魚蝦  
獨爲看碑入  
祠傍日易斜

歐陽石室

出城遙見洞  
入樹却疑門  
昔者閒居處  
而今遊跡繁  
岩房任高下  
雲海各飛翻  
不朽應何以  
能

成一代言

宿石室

四野淒風切重林暖氣餘  
雖於岩上宿宛爾室中居  
一夜夢覓好千年踪跡疎  
栖栖日行役終媿古人書

清源絕頂

登山途已盡突兀上方臨  
未入禪扉裏聊停古樹陰  
石邊泉屢出海際地俱侵  
昔有成仙者茫茫不可尋

百丈盤

山中隨見海此地益無涯片石平於砥行之祇  
覺危正當潮水至便有島風吹羽翼何由借飄  
飄動遠思

南臺

列石真如削猶能勢屢旋登樓纔半壁望鳥或  
之巔橋路中分邑雲陰下覆田南山最高處還  
詠有臺篇

巢雲

泉到巢雲地潺湲乍有聲昔來衆山雨遂掩此  
孤鳴好樹俱相傍斜陽亦與傾屢謀諸勝宿是  
處喜能成

彌陀巖

躡澗何知遠爲岩喜得重徑幽疑篆鳥樹古若  
懸龍坐待塔中火遙聞林杪鐘飯依偏趣意於  
此禮金容

歸巢雲宿

崑分亦非遠人跡暝全稀泉響猶知路藤垂屢

挂衣蠶啼寒不徹雲懶早應歸欲傷殘僧宿山樓多掩扉

晚行見月有懷

昔別當殘月於今魄再生蛾眉如在眼馬首若爲情燁燁丹霞映遙遙碧嶂橫客途欣有伴遂爾及宵征

出米岩

閒行看翠輦騎馬入松杉誤以橋爲洞貪茲寺在岩未歸林際衲惟見海中帆蕭瑟深堪賞猶

餘秋氣銜

梵天寺登大輪山頂望海

淨域莊嚴入梵天上方迢遞陟層巔金光盡繞  
雙行樹寶相純擎十丈蓮石比大輪依法轉海  
將明鏡借空懸此行信是閒爲客隨地猶能一  
叩禪

別興公

我去霞城道而君適海澄殘更催問渡古驛坐  
挑燈彼地無山水相過孰友朋歸期如不負天

柱待同登

主人館中看菊

主人假我館況此菊花叢色入月中淡香飄霜  
後空層階安有致疎幌映俱通不忍別之去翩  
翩黃鵠風

贈戴利溥

之子煙霞姿其文如抽緒志在古人間翩翩乃  
豪舉聞予好遊陟亮已得心許獨立山之阿日  
夜以延佇相見在一時竭歡固其所匪不稱寡

諧而交爲爾女展此彌戀衷聊用申一語詎慚  
瓦缶音欲因叩鐘呂

初入天柱寺

我聞學道者玄區相與成妙契在元理亦以闡  
象形曰初天柱山鬱何愁吟巖至人所託處異  
類効厥靈煜燐煽佛火逶迤抗雲旌下上肆碑  
碣干茲拓而平滄湄與海浦麗崎夢自呈悠悠  
千載後伊予獲遐征雖昔勞夢寐乍見駭覓精  
紫芝猶不死長歌舉其英胡為閱塵世逝水無

時寧

觀梅樓呈管彥懷明府

有夢不必入羅浮有詩不必題揚州天柱一峯  
拔千仞坐此使君之高樓使君高樓俯梅樹屢  
向寒梅覓佳句峰頭有月照見之我來正值青  
天暮青天暮今明月光見梅樹今見四方何以  
蟠古根乃在詰曲之洞門何以蕩遠色乃在微  
茫之海國何以漂素馨礪中水流清且冷何以  
置蒼屏衆山一帶圍青青山一何久梅花不

在後花開與花落酌盡山中酒孟冬十月不著  
梅梅花為我爭先開低枝便如殘雪點冷蕊或  
得疎鐘催山月猶可遇梅花信奇哉使我高樓  
上大呌歌徘徊故是使君陽春之所被令客到  
來花亦喜不然千谿萬壑凍如水何以數株徑  
放山月裏

夜宿樓上同戴利溥林茂之分賦得觀字  
我愛高樓宿深山不覺寒白雲扶榻下蒼壁倚  
簷端谷鳥為清楚風林似急湍况當有奇夢能

接眼中觀

曉望

夢逐疎鐘起披衣得早天日高山影謝雲淨海  
光鮮列邑因溪斷孤帆與鳥連下方知尚暗不  
見有炊煙

戴利藩到山中

忽到峯頭侶頻呼雲外聲雖遲一夜宿猶待衆  
山行我欲追禽向君家有弟兄豈容天柱勝但  
使客知名

石屏

隔山遙已露嵯峨百丈為名詎足多海月初生  
全覺隱江霞欲斷幾能過却疑偃蓋通高樹動  
見連根落碧蘿絕頂盤旋猶可達偏於此地得  
狂歌

象鼻嵒

即道人楊虔  
誠煉丹處

化象為嵒望却真何年神力此能馴瑤光忽吐  
深山夜寶氣長含古洞春拂水拖雲時沒鼻藏  
丹蓄火豈焚身仙家踪迹多應秘大道泮泮苦

問津

燭峰

青天懸燭景石勢生芙蓉照日俱成燄迷煙或  
似烽瘴高站鳥雀海近出魚龍欲騁無窮目猶  
然限一峯

絕頂

昧旦戒披陟清露何瀼瀼既以濡我足復以泫  
我裳我裳不足歎其志在高岡瞻彼若木枝條  
焉升初陽徑海不可留上山亦太剛傾東獲所

被接西襲金芒南北各垂照豈曰位不當白雲  
起縈鬱隨風為飄颻潄汨於林樹川委而術橫  
映之成五色爛然何輝煌譬如列圖史今古陳  
采章浩蕩不可極惟天為之綱君子惡下處所  
視安得詳

觀海洞

登山務窮絕入洞乃抉闕危梁信孤立連崑侖  
相制錦苔作重闔瑤石為高砌白日射以明寒  
泉流而默靜眺滄海外山澤自通氣淒風不時

興林木俱振厲纏綿古藤根永久故不替歷歷  
世外境討之用彌歲

石室歌為戴亨融觀察題

我來海上訪名山聞有至人長閉關城中欲望  
不可得乃在一抹之煙鬟是處名天柱其中有  
石宇造化為大匠自然成規矩誰知至人者乃  
是子大夫早歲遊四方聲名在兩都東陟太華  
之頂兮而西躡匡廬之巔北揖金門之隱兮而  
南招羅浮之仙豈甘茂陵倦欲作六月息愛此

石室居尚存太古色石室中存萬卷書龜文鳥  
跡科斗餘石室中置千斛酒琉璃琥珀不停手  
石室中懸一局棋仙人對奕樵者窺月出兮頂  
上光月入兮照我床雲去兮何湯湯雲歸兮室  
中滿雲去雲歸亦自由古人今日共風流安石  
矯情還祚晉子房掉舌須興劉丈夫濟世在咤  
叱功名自有旂常述然後高卧青山萬事畢我  
終為君題石室

烏崑

穿竹時攢碧瞻崑獨尚玄石欹烏半立草靡虎  
曾眠返照懸如玦寒流沸似絃好奇纔誤入不  
是昔人傳

白雲

何時雲觸石祇見石如雲石在雲何處雲歸石  
不分到來驚巖臬坐久生氤氲應是樵人徑迢  
迢下夕曛

瀑布歌

入瀑布兮山無路流潺湲兮釋情慮石如燒兮

水沃之中若虛兮光陸離山百里兮安知外矜  
軻隆魄兮不防隤勢湍悍兮斗入海海蕩蕩兮  
流始弛流日夜兮天柱傾天柱傾兮山與水平

一線泉

咫尺近山寺力疲斯憇爾乃有石上泉清韻聊  
此始

迷樵徑

林樹深復密白雲時掩扉樵子杳然去不知前  
路非

忘歸石

坐此一片石深更猶未闌只有山中月照人衣  
上寒

盤陀石

日入在何處蒼茫不可測金翠銷已盡悵然始  
無色

贈別章火苑

天柱懸踪迥逢僧訪所居夢纏流水裏手弄白  
雲餘豈以山中賦能忘闕下書終年與幾日去

住復何如

慈雲

未過嶺畔寺先識林中僧  
法水流香積慈雲覆  
佛燈籬分蕞菊老木作假山  
層入此聊閒適連  
晨倦仰登

爐阜

累洞能相屬為隣亦不孤  
天開如玉井水滴似  
金壺燒劫猶遺迹神樞有秘圖  
信當棲隱地何  
事覓歸途

虎磴

即無隱禪師  
道場

虎磴有虎法可羈禪師下山每跨之一朝禪師  
失隻手傳道中途飼虎饒我來山中看且駭禪  
師之傍有虎在但見禪師手短今虎亦不肥鐘  
鼓不鳴今香火微出尋無隱塔崔嵬一片石祇  
留科斗文半作莓苔碧噫我聞今年颶風發海  
水乍來山屹杌樹去其髮今而石斫其骨泉湧  
上天如真月山僧野鹿愁汨汨予恐此山之幾  
為鼇宮而貝闕兮虎吼湏臾拔其窟欲離不離

足應蹶禪師微醒一聲咄但聞山中零落桂花  
香秘辭

鄭輅思招入霞中社

談詩開勝社結宇出塵寰霞紫城中氣煙青海  
上山一時人競爽千古道俱還不是同聲者寧  
能到此間

訪陳貞鉉遇陳元朋因遊林氏園亭鄭輅  
思張紹和後至分得神字

芳園能不遠逆旅卽爲鄰地僻幽情散樓虛遠

態臻池荷遙駐夏林卉欲邀春巧石非關匠微  
波恍遇神經紆時接侶洞小屢添人宿醉牽殘  
夜佳招佇隔辰無期仍此會還是日相親

贈王使君

使君如璫璵其質不受瑕爲政稱神明聞者皆  
驚嗟性中無俗韻燁燁吐詞華海上芙蓉城日  
夕生紫霞使君出行部片片隨其車旣拂眉間  
秀復映筆端花借問使君姓云是舊瑯琊今在  
五湖上震澤以爲家分符之清漳閩海曠且遐

試以擬開度汪洋無津涯

顧園諸子携酒

曰余羈旅人諸子欣旣覲薄言斗酒會携之以  
相就出郭馳何疾之野步履逗何以置斟酌所  
耽在園囿天勝爲我施廼可具營構門外多崕  
嶠纍纍如輻輳奇卉奪繡鮮珍木恍音奏豈曰  
無蕩思泉水在左右魚遊尾徙徙過者皆可瞽  
杯到隨卽竭不知誰所授今日靳爲樂後來奚  
以又

題主人池館

池館情能寄郊原望却舒寒波重似積野色遠  
疑虛步愜惟逢竹歌喧信棹漁我來爲客日偏  
稱此蕭疎

王司李招飲汪都護園

都護園林擬辟疆使君要客共壺觴珠簾碧水  
疎浮影錦障華燈密吐光坐樹久能馴鳥雀臨  
池還欲弄鴛鴦祗綠發興來時遠故許留懽卜  
夜長

別管明府

臨發故遲遲相看不忍離  
應知懷我日卽是別君時  
況值山川好於斯氣候宜  
得携明月返暗道也須疑

送張紹和北上

爾向長安去予尋丘壑  
歸同心薄蘭臭別淚間  
蓬飛雨雪行人急陽春和  
者稀征途萬里外欲發更  
依依

飲馬季聲回小園試清源霜茗

向客誇清茗高僧寄碧岑乍然殘葉火忽沸小  
松音韻自月中勝香於霜後深步來微醉意始  
覺不能侵

子夜歌

叩門聞歡來儂卧竟不起歡尋儂不見直入儂  
帳裏

各自有一物根味欲相通以儂懷抱非博得歡  
心慈

長至夜集諸子小園得開字

上賓初集履小妓妙擎杯欲驗陽光轉斯看春色來  
冰絃中座結霜月暗林開競欲窺生意携燈向野梅

同吳非熊陳元朋徐興公林子真林茂之  
集羅山得寒字

強扶病骨犯危巒此地徘徊轉覺安寺裏客過  
辰屢換林中僧話歲將殘坐於石筍何妨瞑行  
到梅花別是寒漫借禪燈照詩思東方月色出  
簷端

送陳元朋

愛爾飛騰去令人意氣加已須勤雨雪猶欲戀  
烟霞陽候回堤柳春光着苑花無端曲江宴不  
得醉琵琶

送陳貞鉉

獻賦之雙闕題詩在小軒由來重意氣况乃接  
丘園雪裏侵年騎山中入夜猿關雲徒極目聊  
與適西原

送吳仲聲

北方地苦寒征馬去漫漫到日開花早經春度  
雪殘和歌燕市俠射策漢時官應識逢迎衆詩  
名滿眼看

送丘伯几

日送公車客惟君傷我心須知三獻苦還隔九  
重深臘破梅橫騎春歸柳上簪洛陽蘇季子何  
必更多金

同非熊茂之宿藤山館中得空字

欲卧山中雪誰堪枝上風長橋寒氣別孤館俗

情空林影隨清鶴江聲送斷鴻近來多勝賞無  
日不相同

詩

初度見落梅歌

今歲山中春信早臘後梅花半衰草未愁明月  
照成空祇恐東風迹如掃憐予拙宦屢歸家偏  
遇寒梅正吐花曉起不辭寒露濕暮吟頻倚夕  
陽斜曉暮來看不能已但到梅花身似水相逢  
澗曲多農叟作伴天涯幾遊子藤山梅花名始  
傳日見遊人繞樹邊有時雜遝來車馬幾處繁

華列妓筵無那花枝苦攀折游人雖喜居人惜  
香風迢遞渡龍江寒色峻嶒照烏石始信無生  
勝有生有名終不若無名我生飄蓬竟何用且  
向落梅歌幾聲

柯嶼訪陳惟秦宅

馬上迎寒色梅花歷幾村所之俱白雪不識是  
黃昏澗水仍前路人家盡後園向聞棲隱處始  
爲到柴門

宿陳汝翔山樓

山樓相過宿石榻絕塵氛若比前宵夢還深十  
里雲月光寒轉薄江色靜堪分去歲羅浮上惟  
驚有斷羣

女翔向客粵故云

### 竹嶼看梅懷鄧汝高

小橋深澗響潺潺路入寒林復幾灣竹裏梅花  
標素質煙中石鼓潤孤鬟荆門人隔層波外嶽  
嶺雲歸深樹間此日詩成仍寄遠一枝珍重爲  
君攀

### 華林寺看梅有桃花開

路迴城北思淒淒寺倚屏山信杖藜疎雨不曾  
妨客入閒雲元自任僧棲參差蘭若香分逕高  
下松根翠作梯祇惜梅花飛欲盡不知春色在  
桃谿

除夕酌非熊彥先茂之賦

白日掩殘歲紅梅落新池年華不可駐故人還  
在茲